

matangiria kana'ucana

kana'iaara, kana'ucana, kanamara, kana'amisan. kacaua caukia makasi, cumacu'ura usupatu kanasia ia, manasu kana'ucana sua mastaan katangiria. vanai sii na tanasun mita, sua tatia nimiakaka ia, 'esi kavangvang na kana'ucana arapiningi. makai miaa Minkuo 48 cenana ka-8 vuanu 7 taniara, "87 punarun canumu". mataa Minkuo 98 cenana ka-8 vuanu 8 taniara, "Moraku soraru". kaNamasia cau noo poisua niaca'ivia isi, makai 'esi pa rakicacu cupungu.

sua kari mita "kana'ucana" misee ia, niaranai na "'ucanu" sua kari isi. arantai pa 'inia 'una cu kari "'umu'ucanu" misee. imua kari mita sua "kana'ucana" misee ia, 'esi cu tumatuturu, sua kanasia isi ia, 'itumuru 'ucanu taniara. matarava kanasia isi, mamarang Kakanavavu paira cu masima'u makasi, 'akuni kani muri tia sanaviri kakangca. sua tavaru'u tia 'apaica kakangca putungaringari ia, maraa ka'anu tia pamuci. tumatuturu kitana, noo kana'ucana ia, tia matangiri cumacu'ura makananu namuriungu. 'akuni tarane'i niarakaranana sua kakangca, nukai muiri tia kacangini 'inia.

nguai sua tanasun mita 'esi na Namasia. 'una tatia mataa ti'ingai

nungnung, cungkucu mataa vanivaniri 'apitaru cacanu. noo 'akia cucuru tatia vanai, 'esiin 'umu'ucanu, 'akuni pa tia maica 'inia. noo tiain maica 'inia, manung tarasangai pa, cumacu'ura pa, tumatimana pa. noo tiain musiparu canumu, matangiri cumacu'ura saringusu cakuran 'esi kara mirungucu? 'esi kara surumu aramiri'i canumu? 'una kara rapi'i karu nukai ranungu 'esi ma'acunu? tia maica vanivaniri cacanu, taracara cumacu'ura 'una kara vatu rataku 'esi matapari'i? tumatimana 'una kara kakurukurungu karanana riang? 'esiin mirungucu mari'urucan, nukai makacumuru curu ucu, manung tarasangai monangu 'inia, 'apaca'iviun sua tia miakaka. taramanungu 'akia 'apitaru, makasuin ka'anu cu tia pamuci. iakuru takacicini tamna tina'an ngisaa.

masini kavangvang 'unai mari, 'esi cu mara'an arakaranana taniara kakangca. Taiwan tamna cimuru makasua kangvang. imua, ka'anu 'inmamia kana'ucana, noo 'esiin cimuru, tia matangiri mincau namuriungu.

夏季的叮嚀

四個季節對多數族人來說，印象最深刻的是夏季，因為重大災害多數在夏季發生。如 87 水災、莫拉克風災。族人提到這些經歷，可以說還是餘悸猶存。那瑪夏有許多溪流、橋梁及陡峭險路。非必要時，不要接近那些地方。非要通過也要先停、看、聽。若要涉水，留意河水源頭，是否在下大雨？河水是否變多？有沒有枝葉密集漂流？若要經過陡峭的山路，往上方看有無石塊、木屑掉落？若下著大雨、打雷，或雲霧濃厚，先待在原地，確認安全再通過。